

प्रादेशिक समाचार
आकाशवाणी जयपुर-अजमेर

दिनांक 23.06.2024

समय: 18.45 बजे

00000

- 18वीं लोकसभा रो पैलों सत्र काले सूं व्हेला सरू-पेले दिन नवनिर्वाचित सांसदां ने शपथ दिलाई जावेली ।
- मुख्यमंत्री भजनलाल शर्मा कह्यो-पारिस्थितिक संतुलन खातिर पेड़ां रो होणो जरूरी । प्रदेश मांय आज सूं व्ही **'एक पेड़ मां के नाम'** अभियान री सरूआत ।
- एक हजार 5 सौ 63 अभ्यर्थियां खातिर नीट-यूजी री पाछी परीक्षा आज राखीजी ।
- राज्य मांय भरतपुर, डूंगरपुर साथे केई ठोड़ां माथे व्ही बिरखा- -25 जून सूं पूर्वी राजस्थान रे कुछ हिस्सा मांय बिरखा री गतिविधियां मांय बधोतरी री आस ।

00000

18वीं लोकसभा रो पैलो सत्र काले सूं सरू हो रियो है । सत्र रे चालता नव-निर्वाचित सांसदां ने शपथ दिलाई जावेली । प्रोटेम स्पीकर अर वरिष्ठ भाजपा सांसद **भतृहरि महताब** लोकसभा रा नुवा सांसदां ने शपथ दिलावेला । नुवा लोकसभा अध्यक्ष रो चुणाव 26 जून ने व्हेला । 27 जून ने लोकसभा अर राज्यसभा रे संयुक्त सत्र मांय राष्ट्रपति द्रौपदी मुर्मू रो अभिभाषण व्हेला । संसद सत्र आगले म्हीनां री तीन तारीख ताई चालेला ।

000

प्रदेश मांय आज **'एक पेड़ मां के नाम'** अभियान री सरूआत व्ही । मुख्यमंत्री भजनलाल शर्मा भी अभियान रे तैत मुख्यमंत्री आवास माथे आपरी माताजी गोमती देवी रे साथे बेल रो पौधो लगायो । इण मौके माथे मुख्यमंत्री कह्यो के पेड़ आपणे जीवन खातिर घणा जरूरी है जका मिट्टी रे कटाव ने रोकणे रे साथे-साथे पर्यावरण प्रदूषण रोक र पारिस्थितिक संतुलन बणायो राखे है । मुख्यमंत्री प्रदेशवासियां सूं बत्ती ऊं बत्ती संख्या मांय पौध रोपण रो हेलो कर्यो । ध्यानजोग है कि इणी म्हीने 5 जून ने विश्व पर्यावरण दिवस माथे प्रधानमंत्री नरेंद्र मोदी **'एक पेड़ मां के नाम'** अभियान रो शुभारंभ कर्यो हो ।

0000

आपराधिक न्याय प्रणाली प्रशासन मांय भारत प्रगतिशील पथ सूं संबंधित एक सम्मेलन आज चैन्नई मांय राख्यो जा रह्यो है । इण मांय एक जुलाई सूं तीन नुवा आपराधिक कानूनां रे प्रभावी होणे माथे चर्चा हो री है । कार्यक्रम मांय केंद्रीय कानून मंत्री अर्जुन राम मेघवाल कह्यो कि औपनिवेशिक शासकां भारतीयों ने दंडित करणे रे लखस रे साथे भारतीय दंड संहिता रो निर्माण कर्यो हो । वणां कह्यो के औपनिवेशिक

संहिताकरण रो प्राथमिक लगस भारतीयों रो शोषण करणो हो। श्री मेघवाल कह्यो के न्याय प्रदान करणे खातिर अबे भारतीय न्याय संहिता री सरूआत करी ज्यी है। वणों कह्यो के इण बारा मांय उच्च न्यायालयां अर उच्चतम न्यायालय रा न्यायाधीश बरस 2019 सूं राज्यां अर केन्द्रशासित प्रदेशों रे परामर्श सूं काम कर रिया है।

.....

इण सम्मेलन मांय **भारतीय साक्ष्य अधिनियम** अर **भारतीय नागरिक सुरक्षा संहिता** साथे न्यारा-न्यारा विषयां माथे तकनीकी सत्रा मांय चर्चा करी जा री है। सत्र मांय वरिष्ठ अधिवक्ता, उच्च न्यायालयां अर सर्वोच्च न्यायालय रा न्यायाधीश अर कानून रा छात्र अर अधिवक्ता भाग ले रिया हैं।

0000

आकाशवाणी समाचार जयपुर री कानी सूं प्रादेशिक समाचार बुलेटिनां मांय तीन नुवा आपराधिक कानूनां रे बारा मांय जागरूकता लावण रे लकस सूं श्रृंखला चलाई जा रही है। इण रे तैत आज में आपने **भारतीय नागरिक सुरक्षा संहिता 2023** मांय भगोड़ा अपराधियां सूं जुड़योडां प्रावधानां रा बारा मांय बता रिया हा। दण्ड प्रक्रिया संहिता मांय अभियुक्त री गैर हाजिरी मांय मुकदमा रो कोई प्रावधान नी हो। न्यायालय अभियुक्त री गैर हाजिरी मांय साक्ष्य अभिलिखित करणे सूं आगे नी बढ़ पाती। इणी कमी ने दूर करणे रे लकस सूं **भारतीय नागरिक सुरक्षा संहिता री धारा 356** रे तैत भगोड़ा अपराधियां री समस्यां सूं निपटणो पक्को कर्यो गयो है। धारा 86 रे मुजब विदेश मांय भगोड़ा अपराधियां री सम्पत्तियां ने कुर्क करणे रो प्रावधान कर्यो गयो है। ऐडो कर्यो जावण सूं फरार अपराधी न्यायालय मांय हाजिर होणे खातिर मजबूर हो जावे है। धारा 107 रे तैत न्यायालय आपराधिक गतिविधियां सूं हांसिल करीजी सम्पत्तियां री जांच रे पाछे, तय बगत मांय पीड़ित ने अपराध रे ऐडे आगम ने आनुपातिक रूप सूं बांटणे री शक्ति देवे है। उद्घोषित अपराधी यदि न्यायालय मांय हाजिर नी होवे है तो ऐडी स्थिति मांय न्यायालय ने अबे उद्घोषित अपराधियां री गैर हाजिरी मांय सुणवाई कर र मुकदमा ने समाप्त करणे रो अधिकार है।

000

भारतीय वायु सेना पहली बार बहुपक्षीय हवाई अभ्यास अगस्त माह मांय जोधपुर मांय करणे जा री है। **'तरंग शक्ति'** रे नाम सूं होणे वाळे इण युद्धाभ्यास मांय दुनिया री 12 वायु सेनावां रा जांबाज फाइटर **बॉम्बर अर स्ट्रैटेजिक** लिफ्ट विमान भेळा व्हेला। वायु सेना सूत्रां रे मुजब दो चरणां रे इण अभ्यास री सरूआत दक्षिण भारत रे एयरबेस सूं व्हेला। इण रे पाछे अगस्त रे मध्य सूं सितंबर रे मध्य ताई ओ अभ्यास जोधपुर मांय व्हेला। युद्धाभ्यास मांय स्पेन अर यूएई साथे 12 देशां ने बुलायो गयो है। क्वाड देश अमेरिका, जापान अर ऑस्ट्रेलिया रे अलावा यूरोप री तीन बड़ी वायु सेनावां ब्रिटेन, फ्रांस अर जर्मनी रा फाइटर जेट भी अभ्यास मांय हिस्सेदारी करेला।

00000

नीट-यूजी परीक्षा 2024 मांय ग्रेस अंक वाळा सगळा एक हजार 563 पढेसरियां री आज दुबारा परीक्षा राखीजी। इण परीक्षा रो रिजल्ट 30 जून ताई जारी कर्यो जावेला। संशोधित रिजल्ट जारी होणे रे पाछे काउंसलिंग री प्रक्रिया 6 जुलाई सूं सरू व्हेला। एनटीए कह्यो है के पाछी परीक्षा रो फ़ैसलो एजेंसी री उच्च स्तरीय समिति री रपट माथे सर्वोच्च न्यायालय री टिप्पणी रे मुजब लियो गयो है। आं सगळा पढेसरियां ने पेल्यां दिया गया ग्रेस मार्क रद्द मान्या जावेला।

0000

इंदिरा गांधी राष्ट्रीय मुक्त विश्वविद्यालय-इग्नू जुलाई 2024 सत्र सून अस्पताल अर स्वास्थ्य प्रबंधन कार्यक्रम री सरुआत करी है। प्रबंधन कार्यक्रम मांय प्रवेश लेवण खातिर शैक्षणिक योग्यता कोई भी विषय मांय स्नातक राखीजी है। आं कार्यक्रमों री न्यूनतम अवधि 2 बरस अर अधिकतम अवधि 4 बरस राखी गयी है। ओ कार्यक्रम पूरी तरह अंग्रेजी माध्यम मांय उपलब्ध रेहवेला। विद्यार्थियों ने आ कार्यक्रमों मांय बिना कोई परीक्षा रे प्रवेश दियो जावेला। इग्नू जुलाई सत्र 2024 खातिर **प्रवेश परीक्षा खातिर प्रवेश प्रक्रिया** सरु करी दी है। नुवा प्रवेश अर पुनः पंजीकरण री आखिरी तारीख 30 जून राखी गयी है।

000

प्रख्यात विचारक अर शिक्षाविद् डॉक्टर श्यामा प्रसाद मुखर्जी री आज पुण्यतिथि मनायी जयी। प्रधानमंत्री नरेंद्र मोदी श्यामा प्रसाद मुखर्जी ने श्रद्धांजलि अर्पित करता थकां सोशल मीडिया पोस्ट मांय कहयो के डॉक्टर मुखर्जी रो ऊर्जावान व्यक्तित्व देश री हर पीढी ने प्रेरित करतो रेहवेला। अठीने, प्रदेशभर मांय डॉ. मुखर्जी ने श्रद्धांजलि देणे खातिर केई कार्यक्रम राख्या गया। प्रदेश भाजपा मुख्यालय मांय डॉ. मुखर्जी रे फोटू माथे फूल चढा र वां ने नमन करयो गयो। इण मौके माथे पार्टी **प्रदेश अध्यक्ष सी.पी. जोशी अर प्रदेश सहप्रभारी विजया राहटकर** साथे पार्टी पदाधिकारी अर कार्यकर्ता मौजूद रहया। बीकानेर मांय डॉ. मुखर्जी रे बलिदान दिवस अर **सुन्दर सिंह भण्डारी** री पुण्यतिथि रे मौके माथे व्याख्यान माला अर राज्यस्तरीय विशिष्ट जन सम्मान समारोह राख्यो गयो। समारोह मांय विधानसभा अध्यक्ष **वासुदेव देवनानी**, सांसद **राजेन्द्र गहलोत** अर पेल्यां आळा विधायक **ज्ञानदेव आहूजा** साथे 16 हस्तियां ने सम्मानित करयो गयो। कार्यक्रम मांय मुख्य अतिथि रा रूप मांय असम रा राज्यपाल **गुलाब चन्द कटारिया** अर मुख्य वक्ता रे रूप मांय पैली आळी मुख्यमंत्री **वसुंधरा राजे** मौजूद री। जैसलमेर मांय डॉ. मुखर्जी री पुण्यतिथि माथे श्रद्धांजलि कार्यक्रम राख्या गया।

0000

आज अंतर्राष्ट्रीय ओलिम्पिक दिवस है। इण मौके माथे युवा कार्य अर खेल मंत्री डॉक्टर मनसुख मांडविया शुभकामनावां देवता थकां सोशल मीडिया पोस्ट रे जरिये सगळा सून एकता अर शांति ने बधावे देणे खातिर ओ दिवस मनाणे रो हैलो करयो। डॉक्टर मांडविया खेल रे खेतर मांय आपरे जोश, प्रतिबद्धता अर उपलब्धता खातिर सगळा एथलीट री सराहवना करी। खेल मंत्री इण बरस रे पेरिस ओलिम्पिक री तियारियां मांय लाग्योड़ा सगळा खिलाडिया ने भी शुभकामनावां दी। इण बरस रे अंतर्राष्ट्रीय ओलिम्पिक दिवस रो विषय है – **लेट्स मूव एण्ड सेलिब्रेट**। ध्यानजोग है के ओलिम्पिक दिवस री शुरुआत 1948 मांय व्ही ही अर विश्व स्तर माथे खेल अर शारीरिक गतिविधियां ने प्रोत्साहन देणे खातिर हर बरस 23 जून ने ओ दिवस मनायो जावे है। पाली मांय आज जिला ओलंपिक संघ री कानी सून कुष्ठ रोगियां अर झुग्गी झोपड़ी मांय रेहवण वाळा छोटा टाबरा ने फल अर बिस्कुल बांट्या गया। साथे ही बांगड़ स्टेडियम मांय पंछियां खातिर परिंडा लगया गया और पौध रोपण कर्या गया।

0000

प्रदेश मांय लारला 24 घंटां मांय जोधपुर, बीकानेर, उदयपुर, भरतपुर अर अजमेर संभाग रा कुछ भागां मांय हल्की सून मध्यम बिरखा रा समचार है। मौसम केन्द्र जयपुर रे मुजब सबसू बत्ती 33 मिलीमीटर बिरखा जैसलमेर रे फतेहगढ़ मांय दरज करी जयी। वठीने आज केई जिला मांय तापमान मांय बधोतरी सून गर्मी रो असर फेरु बध गयो है। सवाईमाधोपुर अर जैसलमेर मांय तेज गर्मी अर उमस सून आमजन जीवन प्रभावित व्हयो है। वठीने डूंगरपुर

मांय आज दूजे दिन भी बिरखा व्ही। तेज बिरखा सूं सड़का माथे पाणी भर ग्यो। म्हाणा संवाददाता बतायो के भरतपुर मांय आज दोपहरां पाछे बिरखा होणे सूं गर्मी सूं थोडी घणी राहत मिली है।

मौसम केन्द्र जयपुर रे मुजब कोटा, भरतपुर, जयपुर, अजमेर अर उदयपुर संभाग मांय केई ठोड़ा माथे बिरखा व्हे सके है। वठीने जोधपुर संभाग मांय कठे-कठे बिरखा होणे री आस है। 25 जून सूं प्रदेश रे पूर्वी हलका री केई जगावां मांय बिरखा री गतिविधियां मांय बधोतरी व्हे सके है। 26 अर 27 जून ने कठे-कठे भारी बिरखा भी व्हे सके है।

0000

प्रधानमंत्री नरेंद्र मोदी इण म्हीने री 30 तारीख ने आकाशवाणी रे **'मन की बात'** कार्यक्रम मांय आपरा विचार साझा करेला। आ इण मासिक रेडियो कार्यक्रम री 111वीं कड़ी व्हेला। इण कार्यक्रम खातिर श्रोता आपरा विचार अर सुझाव टोल फ्री नंबर 1800-11-7800 रे माध्यम सूं दे सके है। इण रे अलावा **नमो एप** अर **माय जी ओ वी ओपन फोरम** रे जरिये भी 28 जून ताई आपरा विचार साझा कर सके है।

मन की बात कार्यक्रम आकाशवाणी अर दूरदर्शन रा समूचे नेटवर्क, न्यूज़ ऑन ए. आई.आर. वेबसाइट अर **मोबाइल एप** माथे सुण्यो जा सके है। ई ने आकाशवाणी समाचार, डीडी न्यूज़, पीएमओ अर सूचना अर प्रसारण मंत्रालय रे यूट्यूब चैनलां माथे भी लाइव स्ट्रीम कर्यो जावेला।

0000

भारत अर दक्षिण अफ्रीका री महिला क्रिकेट टीमां रे बीचे एक दिवसीय क्रिकेट मैचां री श्रृंखला रो तीजो अर अंतिम मैच आज बेंगलुरु मांय खेल्यो जा रह्यो है। दक्षिण अफ्रीका टॉस जीत र पैले बल्लेबाजी करणे रो फैसलो कर्यो। भारत पैल्यां दोन्यूं मुकाबला जीत र श्रृंखला मांय 2-0 सूं आगे है। एक दिवसीय मैचां रे अलावा, दक्षिण अफ्रीका री टीम एक टेस्ट मैच अर तीन ट्वेंटी-ट्वेंटी अंतरराष्ट्रीय क्रिकेट मैच भी खेलेगी।

0000